

Agir gia en il senn da l'incumbensa

La regenza è pronta d'acceptar l'incumbensa dal deputà Rico Lamprecht

■ (anr/ac) La regenza grischuna è da l'avis da gia agir en il senn da l'incumbensa dal deputà Rico Lamprecht (pbd Val Müstair). Il deputà e cunsegnaders han pretendi da la regenza da procurar per in andant dumber da guardias da cunfin sin la vart grischuna dal cunfin svizzer. En la risposta sin l'incumbensa parlamentara inoltrada dal deputà Rico Lamprecht scriva la regenza da gia agir en il senn da l'incumbensa. Numnadamain da s'engaschar activ ed energicamain tar la confederaziun per ina dotaziun adequata dal corps da la guardia da cunfin. In dumber che correspundia a las pretendi ed abel da schliar las sfidas actualas. Il deputà oriund da la Val Müstair aveva fatg attenta la regenza grischuna sin il lung tschancun grischun dal cunfin svizzer cun trais passagis averts durant l'entir onn, numnadamain en Val Müstair, Campocologno e Castasegna. Passagis vers sid actualmain sensibels. Il deputà ha fatg valair retratgas da persunal da la guardia da cunfin che na promovian betg il sentiment da segirezza tar la populaziun da chasa en ils territoris cunfinants. Gist a las unitads mobilas da la guardia da cunfin attribuescha il deputà da na pudair intervegnir ad uras pervia dal cumpartiment muntagnard e las lungas distanzas dal cunfin naziunal grischun.

Intensivà la collavuraziun

En sia risposta scriva la regenza grischuna dad avair intensivà la collavuraziun cun il corp da la guardia da cunfin per cumbatter il turissem criminal e per dar dumogn a la migraziun illegala. Repetadamain haja ella pretendi da la confederaziun dad augmentar il corps da la guardia da cunfin. La regenza ha visà a la cunvegna administrativa tranter il chantun Grischun e l'Administraziun federala da duana che tractia la collavuraziun tranter polizia chantunala e guardia da cunfins. Ina cunvegna che regleschia tranter auter



Il deputà Rico Lamprecht ha chattà il consentiment da la regenza cun sia incumbensa areguard la guardia da cunfins. FOTO Y. BÜRKL

las patruglias cuminaivlas da polizia e guardia da cunfin. Vinavant existian contacts da la guardia svizra cun las autoritads da polizia da l'exteriur cunfinant per analisar cuntinuadamain la situaziun per pudair agir ad uras. La regenza ha menziunà il project Grischun da la guardia da cunfins che haja già la finamira da reducir e flexibilisar il temp da controlla e da servetsch da la guardia. Quai lubeschia da controllar pli flexibel conform a la situaziun. Per exempel controllas nunspetga-

das al passagi dal cunfin u en il territori da cunfin. La regenza ha fatg attent a sumegliantas reorganisaziuns tar la polizia chantunala per adattar il dispositiv a novs ristgs. La regenza grischuna ha fatg attent en sia risposta che la guardia da cunfins haja adina già chapientscha per ils interess e basegns dal chantun Grischun. Ultimamain tar la tscherna da Cuira sco nov lieu da la centrala d'alarm dal corps ost da la guardia da cunfins. La regenza è pronta d'acceptar l'incumbensa Lamprecht.